



UKA 2015/103  
14. oktober 2015  
Kalistat Lund

**Kalaallit ujaraataasa erlinnartut uppersaatigisinnaasannik periarfissanik assigiinngitsunik nassuiaasioqqullugit kingusinnerpaamik UPA 2016-mi saqqummiunneqartussamik Naalakkersuisut peqquneqarnissaannik Inatsisartut aaliangiiffigisassaattut siunnersuut.**

(Inatsisartunut ilaasortaq Peter Olsen, Inuit Ataqatigiit)

Siunnersuuteqartoq Inatsisartunut Ilaasortaq, Peter Olsen, isumaqatigaarput, ujaqqat pinneraassiat nunatsinneersut "kinaassusilerlugit" uppersaassersorneqartarnissaat siunertaralugu, Naalakkersuisut peqquneqarnissaannik Inatsisartut aalajangiussaqaassasut noqqaassuteqarmat.

Uppersaammik ilisarnaateqarnerup suut uppersassusilimmik qulaarsissutigissanerai ersarissumik aalajangiunneqarumaarnissaat pingaaruteqarpoq. Soorlu pinneraassiap suminngaanneeranerani, sumi suliarineqarsimanerani, kimit suliarineqarsimanerani, ileqqorluttuliornertaqanngitsumik oqaluttuassartaqarnerani il.il. oqaluttuurtumik ilisarnaat imaqarsinnaajumaassasoq takorloorparput soorlu aamma siunnersuuteqartoq siunertamik taamma isikkulimmik ujartugaqartoq.

Maannamiit ukiunilu aggersuni pinneraassiasannik ujarassiornerit annertusiartuinnartumik ineriartorfiunissaat qularnanngilaq. Ulloq siullermiit nunatsinni aalajangersagaqartariaqarpugut uagut maanni nunatsinni suut piumasaqaatiginerigut aammalu qanoq iliornikkut nunatsinnut iluaqutaanerpaassussamik pinneraassianik niuertoqarnissaannik aqqissuussissanerluta.

Pinneraassiasap naleqarnerpaaffissani aatsaat angussavaa pinneraassiarineqarluni naammassineqarnermini ilisarnaammilu kakiukkamik ikkussivigineqareermigut. Naleqassuseq aamma taannaavoq nunatsinnut qanoq isertitsissutaatsiginissaannut aalajangiissuussusaaq. Pingaaruteqarpoq ujaqqap peerneqarneraniit pinneraassiarineqareerluni ilisarnaasserneqarluni kakiorneqareerluni nalissavimminik nalilerneqarnera tikillugu nunatsinniit malinnaavigineqarsinnaanissaa. Ilisarnaammik upeernarsaataassumik piumasaqaateqarnerup malitsigissavaa uagut nunatsinni qanoq piumasaqaateqarnitta malitsikkuminarnerulenera.

Naalakkersuisut, Inatsisartunut Ilaasortaq, Peter Olsen-ip siunnersuutaa itigartinneqaqqullugu innersuussipput, ukiamut Novemberimi annikitsumik aatsitassarsiortarnissat pillugit ataatsimeersuartoqareernissaa utaqqeqaarniaramikku tassanilu oqallisigineqartut aallaavigalugit akuersissummik allagartaliisarnissamut pillugit UKA 2016-mi namminneq saqqummiussiniaramik.

Inatsisartunut ilaasortaq, Peter Olsen-ip siunnersuutigaa ilisarnaammik uppersaasiisarnissat, Naalakkersuisut akissuteqaamminni oqaatigaat namminneq akuersissummik allagartaliisalnissat pillugit siunnersuuteqarnialersaarlutik. Ilisarnaat uppersaataassusaaq aamma akuersissummik allagartaliisarnissat, pineqartut assigiinngitsut marloorpasipput. Uggornassaaq paatsooqqatigiinnerit aallaaviussappata siunnersuutip itigartinneqarnissaannik innersuussinermut.

Inuit Ataqatigiinniit siunnersuutigaarput paatsuunganartoqarnera patsisigalugu siunnersuut ataatsimiitsitaliamut susassaqaartumut aappassaaneerneqartigani ingerlanneqaassasoq.